

# Na kaminda pa Pais Kòrsou (6)

## Kambio di Statüt i konstitushon.

Esaki ta e último página informativo den e forma akí, riba struktura estatal. E página di e siman akí ta trata kambio di Statüt i konstitushon. Ku esaki nos a kubri henter e pakete ku Kòrsou a negoshá ku su partnernan den Reino pa realisá nos struktura estatal. Den e seis simannan ku a pasa, gobièrnu a splika e pakete paso a paso den e página informativo akí. Pronto lo sali un libreto informativo tambe ku ta splika henter e pakete riba kua pueblo lo vota den e referèndem di dia 15 di mei benidero.

### 1. Kiko ta Statüt?

Statüt ta e lei ku ta regla e relashon entre e paisnan ku huntu ta forma Reino Hulandes. Eseinan ta Hulanda, Antia Hulandes i Aruba. Ainda Statüt no ta referí direktamente na Kòrsou, Sint Maarten, Boneiru, Sint Eustatius ni Saba. Pasobra nos ta teritorionan insular ku ta forma parti di Antia Hulandes. Pero dia Kòrsou i Sint Maarten bira pais outónomo den Reino, e ora ei sí Kòrsou i Sint Maarten ta bira partner direkto di Hulanda i Aruba den Reino. E islanan Boneiru, Sint Eustatius i Saba ta bira parti di Hulanda.

### 2. Kiko asina Statüt ta regla?

Statüt ta fiha por ehèmpel ku Hulanda, Antia Hulandes i Aruba kada un ta atendé nan asuntunan interno.

Dia Kòrsou bira pais den Reino, tur e asuntunan ei ta bira asuntunan outónomo di Kòrsou tambe. Tambe Statüt ta mensioná un kantidat limitá di asuntu ku e paisnan no ta atendé riba nan mes: por ehèmpel defensa, relashonnan eksterior i nashonalidat. E asuntunan ei ta kai bou di gobièrnu di Reino mes. Gobièrnu di Reino ta formá pa e ministernan di Hulanda i e ministernan plenipotensiaro di Antia i Aruba, na Hulanda.

Statüt ta fiha tambe ku e paisnan den Reino por traha ku otro boluntariamente i/òf ta duna otro yudansa i asistensia.

### 3. Kiko a palabrá ku nos partnernan den Reino riba Statüt?

Básikamente Statüt ta keda meskos. Pero den e situashon nobo, lo kita e nòmber di Antia den henter Statüt, i pone na su lugá e nòmbernan di Kòrsou i Sint Maarten komo paisnan outónomo den Reino. Tambe ta regla posishon di Boneiru, St. Eustatius i Saba den Statüt. Aruba a pidi pa su nòmber aparesé promé, komo ku Aruba a haña e status di pais outónomo den Reino promé ku nos.

### 4. Kiko a palabrá ku nos partnernan den Reino riba konstitushon?

No a negoshá ku nos partnernan den Reino riba nos konstitushon. Pero maske no a negoshá ariba, konstitushon tambe ta forma parti di e pakete total riba kua pueblo lo vota den referèndem.

### 5. Kiko ta konstitushon?

Konstitushon ta e lei mas importante di un pais. E ta fundeshi di un estado di derecho. Konstitushon ta fiha den liña grandi kiko ta e derechinan básiko di pueblo i kon gobernashon ta organisá. Gobièrnu a tuma dos aña kompletu pa traha riba konstitushon i pa diálogá ku pueblo den diferente bario i na diferente okashon.

## 6. Den e trayekto aki a papia tambe di leinan orgániko. Kiko ta leinan orgániko?

Leinan orgániko ta leinan ku ta basá riba konstitushon. Konstitushon ta fiha direkshon di e pais den liñanan grandi. Kaminda ta nesesario, konstitushon ta preskribí pa regla siertu asunto mas detayá den leinan. Esei ta leinan orgániko. Nan ta regla organisashon i funshonamentu di órganonan di estado i partinan di esei. Por ehèmpel: reglamentu elektoral, lei di kontrolaria general, lei di transparensia den gobernashon, lei di kontabilidad, lei enkuanto e derecho di reuní, areglo di e sistema monetario, etc.

## 7. Kiko mas a palabrá ku nos partnernan den Reino pa realisá nos struktura estatal nobo?

Den e último 6 simannan ku a pasa, ya tur palabrashon pa realisá nos struktura estatal nobo a aparesé sistemátikamente den tur korant na Kòrsou. Huntu nan ta forma e pakete ku tur partner den Reino a akordá na e Konferensia di Mesa Rondó dia 15 di desèmber 2009. Esei ta e pakete ku pueblo lo husga den e referèndem di dia 15 di mei benidero. Pronto e splikashon akí lo sali tambe den forma di un libreto ku lo parti pa tur kas na Kòrsou. Tambe gobièrnu ta parti e libreto na e tantísimo enkuentronan informativo ku gobièrnu ta tene semanalmente pa tur grupo den tur bario di Kòrsou ku ta yama pidi un presentashon na number di telefon 4633225.

## 8. Por rekapitulá e palabrashonnan?

Esaki ta e pakete total di Kòrsou pa realisá nos struktura estatal nobo.

### E pakete total ta trata:

- **Finansa**
  - Solushon pa debe nashonal i supervishon finansiero
- **Hustisia**
  - Konseho pa mantenshon di lei
  - Korte Komun di Hustisia
  - Polis
  - Ministerio Publiko
- **Kambio di Statüt**
- **Konstitushon**



Bo ke un enkuentro informativo den bo bario òf pa bo grupo?  
Yama 4633225 pa un sita.

**Aki 5 aña, tur partner di Reino ta bolbe evaluá e pakete ku e puntonan ku a negoshá, pa mira kua areglo por sigui kuné, kua mester kambia, i kua por terminá.**